

Izjava OHR-a na konferenciji za medije međunarodnih organizacija

Posljedica će biti

Prije nego što pređem na druga pitanja, želio bih naglasiti sljedeće: danas su mediji prenijeli izjavu višeg bh. zvaničnika koji je rekao da neće biti posljedica ukoliko Bosna i Hercegovina krajem ovog mjeseca ne bude primljena u članstvo Partnerstva za mir. To je apsolutno netačno. Članstvo u Partnerstvu za mir i integracija u NATO pružaju najbolje garancije za dugoročni mir i stabilnost u BiH. Njihov značaj za BiH ne bi trebalo podcjenjivati, a posebno to ne bi trebali činiti bh. zvaničnici na visokim funkcijama. Nadalje, ukoliko BiH ne bude mogla ući u Partnerstvo za mir zbog toga što RS ne ispunjava međunarodne obaveze koje ima BiH, to će predstavljati vrlo ozbiljnu situaciju koja se treba rješavati. Bosna i Hercegovina ne može biti talac neuspjeha Republike Srpske. Osobe na najvišim funkcijama u rukovodstvu RS će morati snositi odgovornost. Biće potrebno poduzeti mјere kako bi se osiguralo da Republika Srpska nastavi provoditi aktivnosti u cilju ispunjavanja svojih obaveza, sve dok ne uhapse haške optuženike i prebace ih u Hag. Na kraju, takođe je značajno da BiH ojača svoje institucije na državnom nivou kako bi osigurala ispunjavanje svojih međunarodnih obaveza prema haškom Tribunalu.

RS mora ponuditi rezultate, a ne izgovore

Prvi zamjenik visokog predstavnika Donald Hays i glavni tužilac ICTY, Carla del Ponte su na svom jutrošnjem sastanku razgovarali o svim ovim pitanjima. Saglasili su se da je vrijeme izgovora prošlo i da će se uspjeh Republike Srpske procjenivati na osnovu rezultata, odnosno konkretnije, na

osnovu hapšenja. Takođe su se saglasili da su pokušaji nekih članova SDS da odgovornost za neuspjehe Republike Srpske prebace na međunarodnu zajedicu pokazali da ove osobe svoje obaveze ne shvataju ozbiljno. Samo nadležne bh. institucije, u ovom slučaju organi vlasti RS, mogu pokazati da je BiH odlučna u namjeri da ispoštuje svoje međunarodne obaveze prema haškom Tribunalu. Međunarodna zajednica to ne može učiniti umjesto Republike Srpske.

Neodgovorno manipuliranje

OHR ne namjerava komentirati svaki pojedini događaj u Stocu. Međutim, ono što se dešava je jasno: pojedinici manipuliraju pitanjem Stoca kako bi prije održavanja općinskih izbora kod građana pobudili nacionalističke osjećaje. Građani Stoca od svojih lidera i političkih stranaka zaslužuju bolje. SDA, HDZ i druge veće političke stranke koje su zastupljene u Stocu trebaju nastojati da učine sve što mogu kako bi pokazali odgovorno ponašanje i liderske kvalitete i na taj način dokazali kako nemaju namjeru da patnje građana Stoca iskorištavaju za sticanje cinične političke prednosti. Ukoliko SDA, HDZ i druge političke stranke žele pokazati da su sa natjecanja u tome ko je podnio veću žrtvu prešli na politiku tolerancije i evropskih integracija, to mogu pokazati u Stocu.

Uvođenje sankcija ukoliko kantonalni zakoni o obrazovanju ne budu usklađeni sa državnim Zakonom

U medijima su se danas pojavile neke spekulacije u kojima se tvrdi da se OHR slaže sa konstatacijom da su svi kantonalni zakoni o obrazovanju već usklađeni sa državnim Zakonom. To je istina kada su u pitanju neki kantoni, ali ne svi. Ovo pitanje se tiče vladavine prava. Kantonalni zakoni moraju biti usklađeni sa državnim zakonom koji regulira tu oblast. Ukoliko kantoni odbiju da izvrše to usklađivanje dovode u pitanje autoritet države. One političke stranke koje do petka ne usklade svoje kantonalne zakone o obrazovanju sa Zakonom na državnom nivou će se suočiti sa sankcijama. Sankcije će se

svake sedmice pojačavati, sve dok same stranke ne odluče da je cijena koju plaćaju za podrivanje autoriteta države za njih prevelika.